

h  
OBSERVATIONES  
DE  
FRUCTV ET EFFECTV  
NEGOTII INVTILIS  
NVLLIVS ET IMPERFECTI

---

AD L. XXXIIII. PR. D. DE LEGAT. I.

---

• QVAS  
PRAESIDE

CHRISTOPH. LVDOV. CRELLIO IC<sup>TO</sup>  
POTENTISSIMI REGIS POL. ET PR. ELECT. SAXON  
CONSILIARIO AVLICO DIGEST. VET. P. P. ORDINARIO  
CVRIAE PROVINCIALIS ET SCABINATVS  
ITEMQVE ORDINIS IVRIDICI  
ASSESSORE

\*\*\*\*\*  
AD DIEM XI. IVLII  
A. Q. S. P. EST cl<sup>o</sup> l<sup>o</sup>ccc l<sup>o</sup>  
IN AUDITORIO IC<sup>TORVM</sup>  
DEEENDET

IO. CAROLVS CHRISTIANVS REDSLOBIVS  
IVTREBOCA SAXO

\*\*\*\*\*  
VITEMBERGAE  
EX OFFICINA SCHEFFLERIANA







L. XXXIII. Pr. D. de Legat. I.

ULPIANVS LIB. XXI. AD SABINVM.

*Plane, ubi transferre uoluit legatum in nouissimum, priori NON DEBITVR; tametsi nouissimus talis sit, in cuius persona legatum NON CONSTITIT.*

I

ODIUM NULLITATIS

FAVOR IMBECILLITATIS

**I**ta quidem a natura facti et procreati sumus, ut animus hominis, nisi suffocatus et oppressus, diu torpere et quiescere non posse uideatur; sed semper MOLIATUR aliquid et efficere studeat, ex quo SPEM aliquam UTILITATIS FUTURAE concipiat, et fructum quendam uel ipse capiat, uel ad posteros transmittat. Hoc consilio senex ille, apud STATIVM in *Synephebis*, \* cum otiosi omnino non posset, in  
A 2 exire.

\* Cic. de Senect. cap. 7.

extrema aetate, scerebat arbores seculo futuro et posteritati profuturas, quamuis intelligeret, fructum illarum ad se non peruenturum esse. Ipsa etiam diuina et perfectissima natura, sine ullo suo incommodo, semper aliquid efficit et procurat, nunquam NIHIL agit, <sup>a</sup> sed, quae procreata sunt, fouet, recreat, exornat et confirmat, ut perdurare et FRVCTVM ostendere et spem utilitatis communis PROVENTV suo augere et amplificare possint. Illud studium efficiendi aliquid, quod fructu non careat, per totam naturam, quae uiuit et spiritum ducit, sparsum est, ut, nisi aliquid egerint, animalia ne uiuere quidem iudicentur. Vrsi etiam lambunt catulos et auiculæ foetus suos infirmos et debiles, cibus ore collatis et inter illos diuisis, nutriunt, algentes fouent, in discrimen adductos anxie et cum strepitu ac summo suo periculo defendunt, NE FRVSTRA LABORAVERINT, neue NIHIL EGISSE censeantur. <sup>b</sup> Generaliter, quod M. TVLLIVS <sup>c</sup> docet, BESTIARVM IN FOETV et educatione LABOREM cum cernimus, NATVRAE IPSIVS VOCEM uidemur audire, cum ipsa natura nos admoneat, ne illud, quod coepimus, IRRITVM ESSE et FRVCTV CARERE patiamur. Ex hoc fonte deriuata est illa CASSII ICRI et iudicis omnium opinione sapientissimi iustissimique formula, qua in omnibus iudiciis utebatur, cum saepius interrogaret partes litigantes, CUI BONO fuerit; quasi homo sanus nihil moliri possit sine SPE FRVCTVS et uel SVAE, uel COMMVNIS etiam VTILITATIS. <sup>d</sup>

OMNES igitur laboramus, non solum ut efficiamus aliquid, sed etiam ne NVLLVM et IRRITVM sit, quod effecimus, neue RES FRVCTV illo careat, cuius spe et expectatione ad laborem accessimus. Hoc IVLIANVS et VLPIANVS intellexerunt, qui, etiam a ICRO, semper in ambiguo ita interpretationem faciendam esse, aiunt, VT RES POTIVS VALEAT, QVAM PEREAT, neue NVLLA atque IRRITA dicatur, illamque sententiam in du-

<sup>a</sup> Cic. I. de Natura Deor. 36.

<sup>b</sup> Quintil. Inst. Orat. Lib. II. cap. 1.

<sup>c</sup> Cic. III. de Finib. 19.

<sup>d</sup> Cic. pro S. Rosc. Amer. Cap. 30. 31. pro T. Ann. Mil. cap. 12. et in Orat. Philippica II. c. 14.

dubio eligendam esse, quae APTIOR REI GERENDAE atque ad SUSTINENDVM NEGOTIVM accommodatior esse uideatur. *l. 67. D. de Reg. Iur. et l. 80. D. de Verb. Oblig.* LABORAMVS igitur, ne quisquam facile, qui negotium contraxit, NIHIL EGISSE, neue operam omnino perdidisse, censeatur. Hoc est, quod ueteres dicebant, nullitates in iure esse odiosas, cum scirent abhorrere iudices ab illa sententia, qua negotium susceptum omnino IRRITVM et NULLVM declararetur, illosque potius operam dare, ne res, bona fide gesta, careat fructu et prospero euentu. Omnes certe, si eundem VLPIANVM audias, qui negoria contrahunt, SERIO EGISSE, quod egerunt, et illius rei, quam attigerunt, FRVCTVM aliquem habere uoluisse iudicantur. *l. 31. §. 20. D. de Aedil. edict.* Quae cum ita sint, non solum ignoscimus NOTARIIS, sed ipsos etiam laudamus, si, quamuis non admoniti, instrumentis contractuum clausulas adiciant, quibus negotium susceptum confirmetur; cum, ex CÖMMVNI OMNIUM HOMINVM voto, cauere debeant, ne res coram ipsis gesta INVILIS sit, et NULLA aut IRRITA dicatur, *arg. d. l. 31. §. 20. D. de Aedil. Edict.*

ACCEPISTI, ex quibus causis odiosae sint nullitates Magistris diuinae artis nostrae, et cur iudices operam dare soleant. ne res inter partes gesta et contracta prorsus infructuosa sit, et euentu destituatur; quandoquidem IRRITA illa et INVILIA NEGOTIA propemodum ipsa hominum natura auersatur. Sed ex hoc quidem ODIO NULLITATIS non difficile iudicabitur, cur, e contrario, negotiis INFIRMIS atque MANCIS et IMPERFECTIS FAVEAMVS potius, ne prorsus corruant et INFIRMENTVR. Eleganter PAVLLVS noster obseruauit, publice damnosum esse, si negoria bona fide gesta facile impugnentur atque rescindantur, cum FIDES COMMERCIOIVM corrumpatur, et multi deterreantur, ne nobiscum contrahant, si praeuideant tam facile infirmari negotia, quorum fide et uirtute omnis conuictus et societas hominum communis continetur. *l. 12. §. 1. D. de Administr. et pericul. tutor.*

IGITVR sustinemus etiam imperfecta negotia, ipsisque, si fieri hoc ulla ratione possit, FRVCTVM quendam et EFPECTVM tribuimus, ne partes contrahentes nequicquam studium et operam consumissey et perdidisse iudicentur. Ex hac caussa LEO et ANTHEMIVS militiam illam togaram ADVOCATORVM in tanto pretio habendam esse censuerunt, cum hi quidem. defensionis suae uirtute, LAPSA erigant, FATIGATA reparent, et laborantium SPEM, uitam et posteros defendant *l. 14. C. de Aduocat. diuersor. iudicior.* Haec est fragilitatis humanae miseria, quam PLINIVS<sup>a</sup> cuiusque honestissimi uiri animum subire ait, ut faciles et proni simus ad opitulandum, si quid INFIRMITATE sua collabi et corrumpi uideamus. Haec est memoria illa humanae conditionis, quam MOESTINVS commendauit, et, qua impulsy, facile ignoscimus IMBECILLITATI aliorum, illamque, si res ferat, corrigimus aut confirmamus *l. 27. pr. D. de Conditionibus Institui.* Enim uero recte PAVLLVS noster, quem saepius laudaui, illud legatum, quod ad alimenta aetatis INFIRMAE relictum sit, AD HONOREM ciuitatis pertinere docet; cum haec Magistratum et ciuitatum praecipua cura esse debeat, ut DEBILIBVS ET INFIRMIS succurrant. *l. 122 pr. D. de Legat. 1.*

TANTVM igitur est ODIVM NVLLITATIS, tantus IMBECILLITATIS FAVOR, ut negotia etiam DEBILIA ET IMPERFECTA sustineamus, et omnes boni ad opem ferendam conuolent, si quis IMBECILLITATE lapsus et deceptus esse uideatur. In hac re obtemperandum est VOCI NATURAE:

O maior tandem parcas, insane, minori.<sup>b</sup>

Videmus etiam animalia et bestias foetibus infirmis parcere, ne pereant, donec egredi et circumuolare et libero tandem coelo suaeque fiduciaey permitti possint.<sup>c</sup> Inuitam certe et accendimur occulto quodam stimulo naturae ad ferendam opem, si quid infirmitate sua corruat; cum illa FRACTA ET IN-

FIR-

<sup>a</sup> Plin. III. Epist. 7.

<sup>b</sup> Horat. II. Serm. 3 uers. 325.

<sup>c</sup> Quinsil. Instit. Orat. Lib. II. cap. 7.

FIRMA magis omnino opis alienae indigeant, quam quae per se ualida sunt et perfecta et ipso uigore uirium satis sustinentur. Etiam Barbari misericordiae quodam sensu attinguntur, si uideant, in ipso feruore uictoriae, neque INFIRMIS parci, neque mulieribus, neque INFANTIBVS, neque aetate et senio confectis, quod IVLIVS CAESAR obseruauit.<sup>a</sup> Omnes enim boni honorificentius esse credunt pepercisse, cum perdere potuissent, quam perdere, cum parcere omnino potuissent.<sup>b</sup> Saepe igitur uidemus accidere, ut quibusdam non minus profint sua CALAMITAS et res afflictac, quibus omnes boni opem ferre student, quam aliis prosperi successus, quos plerumque odium et inuidia sequitur. Optime M. TVLLIVS illos, qui INFIRMITATE aliqua lapsi sunt, non tam animaduersione et uelitione quadam dignos, quam uel MISERANDOS esse potius, uel IRRIDENDOS, iudicauit.<sup>c</sup> Nimirum multae nos causae impellunt, ut infirmitati facile parcamus. Ipsa recordatio tot offensionum et errorum, quibus quilibet bonus interdum lapsus est, nos docet, ut in aliis feramus, quod in nobis olim ferri ac tolerari uoluimus: ipsa etiam MISERATIO blandius, quam ira et indignatio, nos afficit: multi, quia se propius ad perfectionem accedere existimant, sibi plaudunt atque gratulantur et sensu quodam tacitae uoluptatis emolliti infirmioribus ignoscunt: denique, cum infirma ac IMPERFECTA negotia, si M. TVLLIO credimus,<sup>d</sup> plerumque CONATVM rei maioris contineant, et spem futuri temporis ostendant, etiam INFIRMA et sublapsa potius subleuanda quam destruenda esse iudicamus. Humanissime APOLLINARIS SVLPICIVS apud Gellium<sup>e</sup> adolescentem quandam, qui sermonem eruditorum hominum de Catone interpellauerat et sua immiscuerat, LAUDAVIT, quod auditiuncula quadam de Catonis familia adpersus fuerit, quamuis ignoraret caput eius controuersiae, quam illi agitabant.

IGNO-

<sup>a</sup> Iul. Caesar. VII. de Bell. Gall. 28.<sup>b</sup> Cic. pro Quint. c. 26.<sup>c</sup> Cic. I. de Orat. c. 37.<sup>d</sup> Cic. in Orat. esp. 29. in fin.<sup>e</sup> Gellius XIII. Noct. Attic. 19.

IGNOSCIMVS igitur infirmitati aliorum, et interdum cVM VOLVPTATE in illam intuemur. Enim uero FABIVS QVINCTILIANVS<sup>a</sup> ad officium oratoris pertinere ait, ut interdum COM- MENDET INFIRMITATEM illius, quem descendit. In INFANTI- BVIS certe hoc maxime AMABILE censetur, si, annis adhuc in- nocentibus, DIMIDIATA uerba tentant; cum uoces eorum, ipso offensantis linguae fragmine, DVLCLVS aures afficiant, et iucundiores esse censeantur.<sup>b</sup> Hinc profectum est illud apud ueteres :

Heu miserande puer - - -  
et - - - miserabilis infans.<sup>d</sup>

qua appellatione affectum, quo ipsa infirmitas nos trahit, pro- diderunt. Ex eo fonte profluxerunt lacrymae illae, quibus pa- rentes subinde infantes DVLCISSIMOS,<sup>c</sup> INNOCENTISSIMOS,<sup>f</sup> MELLITISSIMOS,<sup>g</sup> INCOMPARABILES,<sup>b</sup> et si qua spes maior emicuisset, pueros SAPIENTES,<sup>i</sup> et SUPER AETATEM NOBI- LISSIMO INGENIO PRAEDITOS,<sup>k</sup> SIMILES DEO,<sup>l</sup> NON SI- NE DIIS ANIMOSOS<sup>m</sup> defleuerunt, quod antiqua marmora testantur. Neque alia ratione motus est PAULLVS, ut RVSTI- CITATI quorundam parcendum esse iudicaret. *l. 2. §. 1. D. si in- ius nocte. non ier.* cum et haec prodatur uel infirmitatem animi, uel consuetudinis uitium, quod interdum culpa uacat.

Ex.

<sup>a</sup> Quintil. Instit. Orat. Lib. III. c. 1.

<sup>b</sup> Minuc. Felix in Octauiano cap. 2.

<sup>c</sup> Virgil. VI. Aeneid. uers. 882. et X. Aeneid. uers. 825.

<sup>d</sup> Ouid. Epist. 7. uers. 135.

<sup>e</sup> Gruter. Op. Infer. Tom. I. p. 704. n. 8. p. 535. n. 4. p. 629. n. 7. p. 681.

n. 2. p. 710. n. 3.

<sup>f</sup> Id. Tom. I. p. 671. n. 13.

<sup>g</sup> Id. Tom. I. p. 675. n. 13.

<sup>h</sup> Id. Tom. I. p. 682. n. 9.

<sup>i</sup> Id. Tom. II. p. 1057. n. 2. p. 1055. n. 4.

<sup>k</sup> Id. Tom. II. p. 1037. n. 7.

<sup>l</sup> Id. Tom. I. p. 717. n. 11.

<sup>m</sup> Horat. III. Cann. 4. uers. 20.



EXTREMO, ne quid omittam, ipsa natura, quae in minimis maxima est, quaedam animalia et opera debilia et infirma edidit, non, ut contemnantur et opprimantur, neque ut prorsus INVILIA ET INFRACTIVA sint, sed ut ipsa foueantur et, quamvis imperfecta sint, tamen aliquando profint et pariant aliquam utilitatem

## II

## NULLVM ET IMPERFECTVM

## DVPLICI SENSV ACCIPITVR,

QVAE PLENVM AFFECTVM VOLVNTATIS NON HABENT  
PRORSVS NVLLA SVNT ET INFRACTIVA.

NEQVE TAMEN RES NVLLA ESSE PRAESVMITVR

Satis, credo, comprobauimus, odiosas esse nullitates, quas dicunt, et, si qua fieri hoc possit, negotia etiam IMPERFECTA ET INFIRMA sustineri. Neque tamen hoc perpetuum est. Igitur, ne quis labatur, expediamus, QVO SENSU quaedam NVLLA ET IMPERFECTA appellentur. Generaliter enim, quae uel uim nullam habent, uel postea illam perdunt, NVLLA, IRITA, NON RATA, CADVCA, INVILIA dicuntur, quod BARNABAS BRISSONIVS notauit. <sup>a</sup> Sed apparet, haec esse diuersi generis: quaedam enim NVLLA ET IMPERFECTA sunt, quia, quod DECIVS Imperator ait, PLENVM ANIMI AFFECTVM NON HABENT. *l. 3. C. de acquir. et retin. poss.* Hoc est, quae magis coepta sunt, quam expedita, et quae conatum et umbram rei, quod M. TVLLIVS notat, <sup>b</sup> magis, quam rem ipsam, continent, ut nondum constet de SERIA VOLVNTATE illorum, qui negotium gerendum susceperunt; quaedam, contra, seria quidem uoluntate gesta sunt, sed ita tamen, ut FRVCTVS PLENVS NEGOTII IMPEDIMENTO QVODAM INTERCIPIATVR.

B

SED

<sup>a</sup> Brisson. de Formulis Lib. 1. n. 167.

<sup>b</sup> Cic. in Orat. cap. 29. in fin.

Sed illa quidem, de quibus primo loco diximus, QVOD PLENVM ANIMI AFFECTVM NON CONTINEANT, etiam INFIRMA ET NVGATORIA dicuntur. <sup>a</sup> Tractauerunt / eiusmodi speciem SERVIVS et VARVS et LABEO et IAVOLENVS. l. 25. *D. qui testam. fac. poss.* Disputant enim de testatore, qui, cum testamentum faceret, heredibus primis nuncupatis, PRIVS QVAM SECVNDOS EXPRIMERET HEREDES, OBMVTVISSET: sed SERVIVS et LABEO responderunt, COEPISSSE illum magis testamentum facere, quàm secisse, ideoque illud nullum, nec heredes primos omnino heredes futuros, dummodo constaret, testatorem plures heredes pronunciare uoluisse. Habes testamentum, in quo incertum est, ad quos uelit testator HEREDITATEM TOTAM peruenire. Illa enim demum ultima uoluntas plena appellatur, ex qua apparet,

- - - QVID PRIMA SECVNDQ

CERA VELIT VERSV, SOLVS, MVLTIS NE COHERES. <sup>b</sup>

Igitur, si plures nuncupare uoluit testator, non uideretur plene significasse, ad quem uelit uniuersitatem rerum suarum transferri. Quamuis enim intelligatur, quod partem aliquam hereditatis ad heredes primos pertinere uoluerit, tamen quotam partem hereditatis testator heredibus primis destinauerit, hariolari nemo potest, nisi omnibus coheredibus a testatore nominatis. Huic non dissimile est illud, quod IUSTINIANVS habet, cum testator uellet quidem testamentum facere, sed morbi acerbitate ita affectus esset, ut neque scribere posset neque articulare eloqui nomina heredum: hunc enim magis PRO MORTVO HABENDVM esse censuit IUSTINIANVS l. 29. C. *de testam. et quemad.*

ITAQVE intelligis, si de plena uoluntate agentis non constiterit, actum OMNINO NVLLVM ET IMPERFECTVM esse, ut sanari penitus aut interpretatione sustineri nequeat, ideoque INFRVCTVOSVM ESSE, quicquid molitus fuerit testator. Sed  
 oppor-

<sup>a</sup> Cic. pro A. Caecina cap. 23.

<sup>b</sup> Horat. II. Sermon. 5. uers. 53. 54.

opportune addit LABEO, tunc hoc uerum esse, si CONSTET, plures eum heredes nuncupare uoluisse *d. l. 25. D. qui testam. fac. poss.* ex quo loco cognoscimus, non facile PRAESUMI negotium omnino nullum, sed CONSTARE debere, quod uoluntas non fuerit perfecta. VLP IANVS enim auctor est, etiam tribus uel quinque uerbis; LVCIVS HERES ESTO, fieri testamentum posse, si nullo probabili indicio prodatur, plura adicere uoluisse testatorem. *l. 1. §. 3. D. de Hered. Inst.* At uero magis generaliter IULIANVS et MARCELLVS in ambiguo illam interpretationem praeferunt, per quam uoluntas obscura sustinetur. *l. 12. et 24. D. de Reb. dub.* Et si res aliter extricari non possit, PAVLLVS, ex consuetudine testatoris et regionis coniectura probabili eruendum esse, ait, de quo senserit testator. *l. 18. §. 3. D. de Instrum. uel. instrum. legato.*

QVAE cum ita sint, apparet, in ambiguo quidem PLENAM, NON IMPERFECTAM, uideri testatoris uoluntatem; sed, si plane intelligi nequeat, omnino NULLAM ET INFRUCTUOSAM esse. Hinc TRAIANVS rescripsit STATILIO SEVERO, quod etiam in TESTAMENTO MILITIS unque constare debeat, testatorem, conuocatis hominibus, facere omnino uoluisse testamentum, cum ipsorum testatorum intersit, ne illa, quae OBITER dicta sunt, temere pro testamento militis accipiantur, et uera illorum iudicia iocoso forte sermone, qui ipsis aliquando exciderit, subuertantur. *§. 1. Inst. de Testam. milit.* Eandem rationem etiam VLP IANVS secutus est, qui, duobus testamentis conditis, prius ualere ait, si posterius non sit perfectum *l. 2. D. de Iniusto rupt.* cum IMPERFECTA uoluntas posterior ne quidem sufficiat ad prius testamentum reuocandum.

VIDES igitur, ne in testamentis quidem, quorum maximus fauor est, imo uero, ne in testamento militis quidem, quod multis priuilegiis sustinetur, ratum esse, quod testator dixit, nisi constet de uera testatoris uoluntate, idque constitutum esse, ne falsa et iocosa iudicia pro ueris temere accipiantur. Sed his quidem talibus nulla afferri medicina potest, ideoque ea prorsus infructuosa sunt, et quasi nunquam facta

pro nullis et irritis habentur. Vnum tamen admonendum est, in testamentis non praesumi illam nullitatem, neque probabile esse, quod testator in tanto solennitatis apparatu NIHIL AGERE uoluerit et in ipso mortis articulo nugari. Hinc IMPOSSIBILEM ETIAM CONDITIONEM, sub qua heres institutus est, PRONON ADIECTA potius habemus, et institutionem quasi puram accipimus, ne testator nugarus esse iudicetur *l. 1. §. 6. et 20. D. de Condit. Insti.* Contra, ut diximus, si manifestum sit, actum fuisse NUGATORIUM et imperfectum, aut contraria et inter se pugnantia continere, nihil actum iudicamus. Igitur negotiis inter uiuos, iisque minus solennibus, in quibus facilius iocum admittimus, NIHIL omnino ACTVM dicitur, et tota res inutilis uidetur, si IMPOSSIBILIA aut inter se pugnantia negotio contineantur, quod MAECIANVS obseruauit *l. 31. D. de Oblig. de action.*

## III

## NEGOTIUM IMPERFECTVM

QVOD PLENAM VOLVNTATEM CONTINET

SI LEGE PROHIBENTE SVSCEPTVM SIT

AVT PER IVRIS IGNORANTIAM CORRVPTVM

ALLEGANTI NON PRODEST

INTERDV M TAMEN TERTIO.

HAEC NEGOTIA NONVNQVAM

CONTRA VOLVNTATEM AVCTORIS

INTERPRETAMVR.

**E**xposuimus de uoluntate imperfecta, quae non plenum affectum habet, adeoque irrita est et nugatoria, et fructu caret. Sed haut paulo secius de illis iudicandum est, in quibus APPARET quidem, de quo illi, qui negotium contraxerunt, SENSERINT, alio autem impedimento infirmantur, ut plenum omnino fructum non habeant, neque respondeant illius, qui negotium suscepit, uoluntati. Haec talia enim uel propter LEGIS PRO-

HIBITIONEM non subsistunt, et TURPITUDINEM aliquam continent, aut certe iuris ignorantiam produnt, quae et ipsa turpis est, uel alio defectu et uirio debilitantur. Prius igitur de his uideamus, quae TURPITUDINEM aliquam continent, et uel lege prohibente facta sunt, uel IURIS IGNORANTIAM et contemptum indicant. Sed disputatione uix indiget, quae TURPITER gesta sint, auctori suo non prodesse, neque credendum esse illi, qui propriam turpitudinem alleget. Hoc enim LABEO, PAVLLVS, MARCELLVS atque VLPIANVS tradiderunt. *l. 2. et 4. D. de Condict. ob turp. caus.* Sed luculentius Imperatores THEODOSIVS et VALENT. omnia, quae LEGE PROHIBENTE contracta sint, non solum INVUTILIA, sed etiam PRO INFECTIS HABENDA ESSE, praeceperunt, quamuis ipsi legi prohibenti non adiecta sit poena nullitatis. *l. 5. C. de Legib.* Haec igitur auctori suo non prosunt, neque ullum fructum, neque actionem pariunt, sed, quantum ad auctorem turpis negotiū attinet, PRO INFECTIS penitus accipiuntur. Ante aliquot annos ex uicina quadam Academia ICTis Vitembergen-sibus oblata est eiusmodi species, in qua caupo, contra Statuti prohibitionem, hospiti et conuictori suo ultra mensis spatium fidem habuerat de pretio pro alimentis mensuris promisso. Constitutum enim erat, ne adolescenti Studioso pretium alimentorum et conuictus ultra mensem crederetur. Caupo, qui per integrum annum alimenta dederat, pretio non exacto, anni integri pretium postulabat. Reus excipiebat, se NULLITER, hoc est, nequicquam epulatum esse, cum LEGE PROHIBENTE sibi fides habita fuerit a caupone Actor inuocabat Deorum et hominum fidem, seque ex penore consumto satis intelligere clanimabat, quod non NULLITER, sed VERE ET LAVTE epulatus sit conuictor suus. Nos autem actorem ab actione repulimus, quia fidem habuerat hospiti contra legem prohibentem, et quia infectum uidebatur illud negotium, quod propriam turpitudinem actoris contineret, ideoque ipsi in iudicio pridesse non posset. Ita reus opimam praedam, decem mensium alimenta gratis, nullo pretio exsoluto, abstulit.

Nihil igitur agit, qui CONTRA LEGEM PROHIBENTEM aliquid negotii molitur; sed hactenus duntaxat, ut ipsi auctori non prolit, quod gestum est; cum ex aduerso CONTRA IPSVM turpitudine eius efficaciter omnino allegetur, et ipse etiam de damno sarciendo teneatur. Hoc enim iure utimur in omnibus delictis, et luculenter illud docent PAVLLVS, IULIANVS atque VLPIANVS. *l. 1. et 2. D. de Condict. ob turp. caus.* Elegantissime hoc CASSIVS et PAVLLVS obseruarunt. Si quis enim DOLO renunciauerit societati, hic quidem socium a se, non uero se a socio, liberabit, sed communicare lucrum cum socio debebit, lucro autem, quod socius postea acquisiuerit, carebit. *l. 65. §. 3. D. pro Socio.* Hic igitur dolosam renunciationem allegare non poterit, si socius lucrum commune petierit, sed contra ipsum socius efficaciter excipiet de renunciatione facta, si ipse lucrum postulauerit, quod socio postea obtineat. Non multum uero ab his recedunt, quae per ignorantiam IVRIS et neglectis substantialibus partibus a lege praescriptis etiam temere suscepta sunt. Haec enim ipsa etiam TURPITUDINE NON CARENT. PAVLLVS certe IVS IGNORARE NON PERMITTIT. *l. 1. D. de iur. et fact. ignor.* et PAPINIANVS, IGNAVIA suam praetexentes non audiendos esse, ait, *l. 78. §. 2. D. de Leg. II.* et IUSTINIANVS, DESIDES HOMINES AC IVRIS CONTEMPTORES ODIOSA EXCEPTIONE REMOVENDOS ESSE, affirmat. *l. 3. in fin. C. de Annal. Except.*

IMO uero, etiam CONTRA VOLUNTATEM contrahentis, qui per iuris ignorantiam solennia neglexit et lapsus est, aut TURPITER quid fecit, negotium interpretatur. Eo pertinet, quod, si quis, per nouationem, illud, quod alius debebat, sine tutoris auctoritate a pupillo stipulatus sit, REM AMITTAT, cum posterior nouatio, neglecta tutoris auctoritate, sit INUTILIS, ET PRIOR OBLIGATIO PER NOUATIONEM, QVAMVIS NULLA MET INUTILEM, SVBLATA SIT, ideoque creditor, neque a priore debitore, qui per nouationem liberatus est, rem suam possit repetere, neque a pupillo, cum quo NULLITER contraxit, *§. 3. Inst. quibus modis toll. oblig. l. 1. §. 1. D. de Novat.*

Ex

Ex eadem iuris regula descendunt illa, quae modo de *DOLOSA* renunciacione societatis diximus, quam *CONTRA VOLUNTATEM* renunciantis socii ira interpretamur, ut ipsi haec noceat, non socio, quem ipse per dolum a se liberauit *d. l. 65. §. 3. D. pro socio*. In his speciebus creditor et socius idem patiuntur, quod canis ille apud Phaedrum, \* qui

- - - carnem dum ferret natans,

Lympharum in speculo uidit simulacrum suum,

Aliamque praedam, ab alio ferri putans,

Eripere uoluit, uerum decepta auditas,

Et, quem tenebat ore, dimisit cibum,

Nec, quem petebat, potuit adeo attingere.

NOVISSIME ante aliquot menses Icti Vitembergenses causam non dissimilem tractauerunt. Proponebatur, Carfam defunctam *PACTA DOTALIA* cum marito iniisse, ius autem uariandi et aliter de rebus suis disponendi sibi reseruasse, et postea condidisse testamentum, in quo a pactis dotalibus discesserit, et res quasdam haereditarias, marito antea in pactis dotalibus promissas, heredibus suis reliquisse. Heredes ex testamento hereditatem petierant a superstitie marito, sed repulsi erant, quia *VITIOSVM* erat testamentum et, propter defectus quosdam, pro *NULLO* atque *INFECTO* habitum fuerat. Igitur heredes, mutata actione, ex *PACTIS DOTALIBVS* illa petenda esse censuerunt, quae in pactis illis, ante testamentum initis, non marito, sed heredibus uxoris assignata erant. Ordo noster quidem etiam ab hac actione heredes depulit, et iussit illos secundum Statuta loci succedere, cum pacta dotalia, reseruato iure uariandi, per testamentum subsequutum, quamuis hoc *NVLLVM* ET *IMPERFECTVM* fuerit, *REVOCATA ESSE CENSERVNTVR*, ideoque neque ex pactis dotalibus, neque ex testamento, agi possit.

Igi.

\* Phaedrus I. Fab. 4.

IGITUR testamentum illud NULLVM, contra uoluntatem testatricis, interpretati sumus, ut heredes non solum ex testamento nihil acciperent, sed neque ex pactis dotalibus fructum caperent, quem illis sine dubio testatrix reliquisset, si potuisset praeuidere infirmatum iri testamentum suum. In qua re eandem rationem secuti sumus, qua VLPPIANVS et IUSTINIANVS usi sunt, *l. 34. pr. D. de Legat. l. et §. 1. Inst. de Ademption. Legator. et translat.* Hi enim TRANSLATIONEM legati, neglectis solennitatibus, INUTILITER factam, tamen ut ADEPTIONEM LEGATI ualere censuerunt; quando quidem, qui rem Titio legatam in Iauolenum transferre uoluit, certe Titio nuda uoluntate efficaciter adimere uoluit legatum, quamuis, propter solemnitatem neglectam, ipsa translatio legati per se non fructuosa sit, sed inutilis et nulla habeatur. <sup>a</sup> Legatum igitur manebit in hereditate contra uoluntatem testatoris, qui Iauoleno prospicere uoluit, non heredi.

ITAQUE, quae propter ignorantiam Iuris et neglecta solennia pro infectis habentur, aut turpiter facta sunt, tamen aliquando uim quandam et interpretationem accipiunt contra uoluntatem eius, qui negotium suscepit.

Non alienum ab hoc loco est, quod POMPONIVS ait, FRVCTVARIUM, qui usum fructum EXTRANEO CEDAT, NIHIL AGERE, cum ius illud ad personam ipsius restrictum sit, sed PERIRE VSUMFRVCTVM, atque ad proprietarium reuerti *l. 66. D. de iure dot. vid. l. 15. D. Famil. ercisc.* Vides, cessionem, NULLO IVRE factam, CONTRA VOLUNTATEM CEDENTIS ita accipi, ac si cedens RENVN CIAVERIT iuri suo, quod LEGE PROHIBENTE in alium transferre uoluit, quamuis ad hunc nihil perueniat ex illa cessione. <sup>b</sup> Eodem iure de FEVDIALIENATIONE ILLICITA solemus iudicare. Si enim Vassallus in alium transferre Feudum uoluerit sine consensu domini directi, NIHIL ad EMTOREM perueniet, cum uenditio CONTRA LEGEM

PRO-

<sup>a</sup> uid. Praefidis Dissertutio: *Quomodo legatum nuda uoluntate adimatur.*

<sup>b</sup> Vinn. in Comment. ad §. 3. Inst. de Usufructu.



PROHIBENTEM facta PRO NVLLA habeatur; sed ipse feudo PRIVABITVR, quasi RENVN CIAVERIT iuri suo per ILLICITAM uenditionem, *II. F. 44. et 55.* quod etiam Germani nostri probauerunt. *Ius Feud. Al. cap. 26. Ius Feud. Sax. art. 19.º*

AB eadem iuris regula profectum est, quod MODESTINVS ET PAFINIANVS responderunt: si quis rem, alii legatam, postea DONAVERIT uxori, quamvis INV TILIS sit DONATIO, tamen legati reuocationem inutili illa donatione contineri: ut neque uxor, cui donatum est, neque legatarius rem accipiant, sed haec apud heredem maneat contra uoluntatem testatoris *l. 13. et 24. §. 1. D. de Adimend. uel. transfer. legat.* Idem VLP IANO in mentem uenit. Hic enim *l. 6. D. de Reg. Iur.* eum, qui hereditatem in alium transferre uoluerit, negat HEREDEM FIERI VOLVISSE, quia consilium transferendi cum repudiatione hereditatis coniunctum esse uideatur. Igitur nec ipse heres erit, neque ille, ad quem ius suum transferre uoluit, sed successionem ab intestato locus erit CONTRA HEREDIS VOLUNTATEM.

OPPORTUNE idem VLP IANVS alio loco praecipit, eum, qui testamentum tanquam inofficiosum IMPROBE IMPUGNAVERIT, illud amittere, quod ipsi legatum erat in eo testamento. *l. 8. §. 14. D. de inoffic. testam.* Ex quo loco apparet, querelam inofficiosi, quamvis IRRITA fuerit, et quamvis actor uictus fuerit et depulsus a querela, tamen VIM ALIQVAM HABERE, et efficere, ut actor legato suo excludatur, quod non repudiaturus fuisset, si sciuisset, querelam inofficiosi irritam futuram.

SED de his speciebus deinceps locus erit exponendi.

## IIII

## NEGOTIA

QVAE DVOS ACTVS PERFECTOS CONTINENT

VNA PARTE INTERDV M VALENT

EX ALTERA PARTE INFIRMANTVR

QVOD LOCVM HABET ETIAM IN NEGOTIIS

QVAE AD IVS PERSONARVM PERTINENT.

**A**CCEPISTI negotia, quae plenum quidem affectum voluntatis habent, sed propter legis prohibitionem aut defectum solennitatis et ignorantiam iuris infirmantur. Superest, ut de ALIO IMPEDIMENTO uideamus, quod efficit, ut etiam perfecta uoluntas FRVCTVM PLENVM nancisci nequeat, sed duntaxat ex parte aliqua sustineatur. Hoc accidit in illis negotiis, QVAE PLVRES ACTVS PERFECTOS CONTINENT, quorum quilibet diuersam substantiam desiderat, si uelimus cum ad PLENVM FRVCTVM peruenire. In his igitur, si SOLENNIA SVBSTANTIALIA, quae ad unam partem requiruntur, deficient, sed obseruata tamen sint illa, quae ad alterum actum PERFICIENDVM pertinent, pars posterior sustinebitur, pars prior NULLA ET IRRITA dicetur. Vt, ecce, si quis uelit testamentum condere, quod et heredis institutionem et legata continere debeat, sed quinque testes duntaxat testamento adhibeat, legata, quasi ex codicillo et fideicommissio, efficaciter petentur, heredis autem institutio infirma est; cum haec septem testes desideret, quinque autem sufficiant ad codicillos, legata et fideicommissa.

QVAEDAM igitur negotia plenam quidem uoluntatem habent, sed pro parte tantum sustinentur, ex altera parte CLAUDICANT, et per impedimentum aliquod iuris INFIRMANTVR. Haec talia, quamuis regantur PERFECTA VOLVNTATE, tamen

IMPERFECTA sunt, et pro parte quidem NULLA atque IRRITA dicuntur, neque uero PRORSUS INFRUCTUOSA sunt, sed utilitatem aliquam pariunt, FRUCTV autem PLENO, quem contrahentes sibi proposuerant, destituuntur. Vix locus est dubitationi, quin haec negotia claudicantia possint NULLA et IMPERFECTA appellari. M. TVLLIVS enim illud demum PERFECTVM dicit, quod EXPLETVM est,<sup>a</sup> et omnibus numeris ABSOLVTVM,<sup>b</sup> et cui NIHIL ADDI POSSE uideatur. <sup>c</sup>

IGITVR imperfectum est, quod ex parte aliqua claudicat, et cui aliquid deest ad plenissimam utilitatem. Sed haec IMPERFECTA etiam NULLA appellantur, quia non implent auctoris sui uoluntatem. §. 7. *Inst. Quibus mod. testam. infirm.* Operae pretium fuerit inuestigare, quem fructum et effectum ex negotio IMPERFECTO expectare posse uideamur. At uero in negotiis quidem, quae ad ius PERSONARVM et FAMILIAE referuntur, quamuis haec, maxime propter sacrorum perturbationem, multas solennitates desiderauerint, tamen liberales fuerunt Architecti legum Romanarum, ut, si haec negotia PLURES ACTVS PERFECTOS CONTINERENT, ipsa quidem subsistere iudicarentur ex illa parte, QVAE NULLAM SOLENNITATEM DESIDERAT, quamuis pars altera, propter defectum solennitatis, infirmetur. Bene enim apud CATONEM scriptum esse refert antiquitas, eum seruum, quem dominus, actis interuenientibus, FILIVM SVVM NOMINAVERAT, LIBERVVM fieri, licet ei hoc ad ius filii accipiendum non sufficiat. §. 12. *Inst. de Adoption.*

HABES negotium, quod duos actus perfectos continet, Dominus enim seruum suum ADOPTARE in locum filii uoluerat, adeoque etiam LIBERTATEM ipsi DARE non detrectauerat,

C 2

cum

<sup>a</sup> Cic. II. de Fin. c. 15.

<sup>b</sup> Cic. I. de Orat. 28. et II. de Natur. Deor. 13.

<sup>c</sup> Cic. in Orat. cap. 1.

cum nemo iura filii et familiae consequi possit, nisi qui libertate sit donatus. Prior actus ADOPTIONIS inutilis et nullus uidebatur, quia seruus duntaxat NOMINAVERAT filium suum, quod ad obtinendum ius filii, nulla solennitate adhibita, non sufficiebat. *l. 13. 14. C. de Probat.* Sed secius de parte posteriore illius actus iudicabimus, qua testator, cum seruus filium esse uellet, etiam libertatem illi dare uoluisse censetur. Nimirum LIBERTATIS DATIO, cum NUDAM VOLUNTATEM, nulla autem solennia, desideret, SOLA NOMINATIONE FILII continebatur. *l. un. §. 1. et 2. C. de Lat. libert. tollend.*

IGITUR appellatio filii non habet uim adoptionis, sed ualeat ut manumissio, sine qua seruus adoptari non potest. Opportune enim PAVLLVS et ULPIANVS monuerunt, eum, qui PLUS possit et uelit, etiam MINVS posse, et uoluntate sua comprehendere, cum semper sub maiori etiam minus contineri uideatur. *l. 21. 26. 110. pr. 163. 165. D. de Reg. iur.*

GENERALITER igitur, si actu principali et maiori minus aliquod comprehendatur, quod omnibus numeris suis perfectum et absolutum est, hoc MINVS fructu et effectu non destituitur, quamuis PRINCIPALIS actus plenam substantiam non habeat, et propter defectum solennitatum, aut alia ex causa, infirmetur. *l. 11. in fin. D. de Liber. et posthum.* Vnum duntaxat admonemus, si minor actus speciatim exceptus sit, ne sub actu principali comprehendatur, aut si conditio adiecta sit, ut ne minus quidem ualeat, nisi maius et principale negotium subsistat, tunc neutrum efficaciter allegari. *l. 7. §. 3. de Reb. eor. qui sub tut.*

IN ceteris igitur speciebus, nisi aliud actum fuerit, sub maiori actu, qui solennitatem desiderat, etiam minor comprehenditur, cuius substantia salua est, quamuis principalis actus nullus et irritus dicatur. Sed res disputatione uix indigeret, nisi PAVLLVS noster turbas daret, et sibi ipsi contrarius esse uide

videretur in hoc argumento. Idem, inquam, ille PAVLLVS, qui antea in maiori semper etiam minus inesse dixerat. *l. 110. D. de Reg. iur.* mox, mutata ratione, praecipit, si principalis causa non subsistat, ne ea quidem VALERE, QVAE SEQUANTVR. *l. 129 et 178 D. de Reg. iur.* Videtur igitur PAVLLVS omnino infructuosum iudicare negotium, in quo causa principalis non subsistat. Sed certius est, PAVLLVM non locutum esse de negotiis duobus perfectis et separatis, quae uno actu continentur, sed de his duntaxat, QVAE sequuntur, tanquam EFFECTVS ET INSTRUMENTA causae principalis. Effectus enim et instrumenta corruunt, si causa deficiat, ex qua effectus dependet, et propter quam media et instrumenta comparantur. Secius igitur iudicandum, si uno actu duo negotia perfecta et separata, quorum utrumque per se vim suam habere et subsistere potest, comprehensa fuerint. In his enim regulam iuris sequimur; quod VTILE per INVITILE non vitietur, et quod sub MAIORI MINVS etiam intelligatur.

IGITVR negotium principale inutile vim tamen negotii minus principalis, sub eo comprehensi, sine dubio habebit, si modo solemnia minus principalis negotii salva sint, et perfectam ostendant voluntatem. Quare efficitur, ut etiam adoptio inutilis, prout docuimus, valeat tanquam manumissio, quae nullius solennitatis indiget, atque ipsa adoptione continetur. Non dissimilem speciem tractavit PAVLLVS *l. 132. D. de Verbor. Oblig.* in qua quis filium alterius absque solennitate hac formula suscepserat: SEEVUM NON ALITER QVAM FILIVM OBSERVATVRVM ESSE, et poenam stipulationi adiecerat, quam oluturus esset, si ipse defereret officium parentis. Hac enim stipulatione, quamvis ius filii non acquiratur, ideoque haec adoptio nulla sit, hoc tamen efficitur, ut filius, ita susceptus et NVLLITER adoptatus, temere domo expelli aut exheredari et excludi emolumentis filii non posse videatur. Et hoc quidem iure utimur, si ad statum personarum pertineat negotium susceptum.

## V

## NEGOTIA

QVAE AD IVS RERV M PERTINENT  
IN PRIMIS VLTIMAE VOLVNTATES  
ET VSVCAPIONIS TITVLVS  
EX PARTE INTERDV M VALENT  
SI PARS QVAEDAM SIT PFRFECTA.

**S**uperest, ut de IVRE RERV M exponamus, et inprimis de VLTIMIS VOLVNTATIBVS et de usucapione, cuius beneficio contendimus ad ius reale consequendum. Non ero verbosus in re manifesta. Superiori enim capite comprobatum est, in ambiguo eam interpretationem eligendam esse, cuius ope res potius SVSTINEATUR quam infirmetur *l. 12. et 24. D. de Reb. dub.* Non attingam, quae de CLAVSVLA CODICILLARI a multis copiose tradita sunt. " Constat enim inter omnes, illam efficere, ut testamentum, detracta quarta Trebellianica, valeat ut codicillus ab intestato, vel ut fideicommissum, quamvis deficient solennitates testamenti; dummodo illa non neglecta sint, quae ad formam substantialem codicilli et fideicommissi requiruntur. Vnum VLPIANVS monet, quod testamentum non valeat ut codicillus, si testator NON VOLVERIT supremum iudicium suum valere iure codicilli *l. 1. D. de Iur. Codicillor.* Sed in dubio, ut diximus, praesumitur enixa voluntas testatoris, ut quacunque ratione valeat omnino testamentum. Igitur VLPIANVM in *lege 1. de Iure codicillorum* de illa specie duntaxat interpreto, si testator expresse et luculenter declaraverit, quod nolit omnino successores ab intestato hereditatem suam attingere, cum hoc necessario fieret, si testamentum valeret iure codicilli.

SED omittere non possum, quod SCAEVOLA *l. 76. D. ad SCtum Trebel.* tractavit. ' Air enim, si pater filio heredi instituto PVFILLARITER SVSTITVERIT in codicillis, inutilem

lem quidem esse substitutionem, cum pupillaris substitutio septem testes desideret et omnem solennitatem perfecti testamenti; tamen benigna interpretatione receptum esse, ut hereditas substituto, *QVASI EX FIDEICOMMISSO*, debeatur. Ex hoc loco enim intelligitur, substitutionem *INVUTILEM*, ut omnia testamenta *IMPERFECTA*, non prorsus vim suam perdere, si forma substantialis fideicommissi non neglecta sit in suprema testatoris voluntate.

*SED* maxime in *LEGATORVM* interpretatione obtinuit, ut, quamvis imperfecta, benignius accipiantur, ne pereat beneficium a testatore liberaliter relictum. Eo pertinet, quod si legatum sit Sempronio amico, et plures sint Sempronii amici, legatum illi relictum censeatur, qui maiore caritate et iure familiaritatis arctiori cum testatore coniunctus fuerit, quamvis imperfecta sint verba testatoris *l. 10. pr. D. de Reb. dub.* Magis meretur observari, quod heres, qui iussus sit *REM ALIENAM REDIMERE* et legatario praestare, si redimere nequeat, *AESTIMATIONEM* seu *PRETIUM* illius rei legatario praestare teneatur; cum appareat, testatorem, dum rem alienam redimi voluit, quamvis redemptio sit impossibilis, tamen voluisse pretium seu rem eiusdem pretii ad legatarium omnino peruenire. Hoc enim *GAIVS* noster docet *l. 14. §. 2. D. de Leg. III.* Dicemus igitur, legatum, cuius praestatio *IMPOSSIBILIS* EST, per se quidem infirmum atque nullum esse, sed eatenus tamen valere, quatenus sub *MAIORI* legato etiam *MINVS* continetur. Cum itaque aestimatio sit res minor quam ipsa res legato comprehensa, tamen minus illud, hoc est, aestimatio, debebitur, ut ita satis fiat voluntati testatoris. \*

*GENERALITER IUSTINIANVS*, mentem testatoris inspicendam esse, ait, non haerendum esse in verbis, ut ne vitium quidem *TABELLIONIS* heredi aut legatario noceat, si constet de mente testatoris *l. 24. C. de Testam. et quemadm.*

*QVAE*

\* vid. Praefidis Dissert. de Legato tacito et implicito.

QVAE cum ita sint, fauemus negotiis etiam IMPERFECTIS, per quae dominium uel ius reale acquiri debet, si illa possint interpretatione sustineri. Opportune HERMOGENIANVS, legatum etiam non iure relictum, ait, VSUCAPI POSSE pro legato, si bona fide res fuerit possessa, quamuis ex titulo inutilis legati. *l. 9. D. pro Legato.* Hanc rationem semper uidetur secutus esse HERMOGENIANVS in definiendo iure VSUCAPIONIS, ut sufficiat quoque titulus imperfectus, in quo perfectum aliquid contineatur. Igitur, quamuis uenditio, DONATIONIS CAUSSA facta, non sit uera uenditio, tamen, si res tradita fuerit, ex HERMOGENIANI sententia quasi donata usucapitur *l. 6. D. pro Donato.* Quandoquidem enim, qui donationis caussa uendidit, tacite donauit, et rem gratis ad alterum peruenire uoluit; ad usucapionem sufficere uisa est donatio implicita, quae uenditione illa tacite comprehenditur. Sed de hoc argumento capite proximo trademus.

Discedam ab hoc loco, si de testamento PARENTVM NVLLO et INOFFICIOSO aliquid addidero, quod antea adiicere uolebam. Videlicet constat inter omnes, HEREDIS INSTITUTIONEM esse FVNDAMENTVM totius testamenti, quo sublato, necesse est, omnia ACCESSORIA supremae uoluntatis corrui et INFIRMARI. Igitur, si per querelam nullitatis aut inofficiosi testamenti heredis institutio rescissa fuerit, subtili iure non solum heredis institutio, sed totum etiam testamentum quasi CADVCVM et NVLLVM uim suam perderet, ut ne legata quidem deberentur. Sed Imperatoris benignitas effecit, ut legata nihilominus consistant, quia ad officium liberorum pertineat, ut exsoluant legata; modo constiterit de PERFECTA et ENIXA uoluntate testatoris, *Nov. us. cap. 3. seq.*



## VI

ETIAM INTER VIVOS NEGOTIA  
 QUAE CONSENSVM PARTIVM DESIDERANT  
 SVBSISTVNT QVAMVIS IMPERFECTA SINT  
 DVMMODO ALIQVID PERFECTI CONTINEANT  
 IDEM IN CONTRACTIBVS IMAGINARIIS  
 ET IVRE FORMVLARIO OBSERVATVR  
 PRAESCRIPTIO PER CITATIONEM INTERRUPTVR  
 QVAMVIS LIBELLVS SIT INEPTVS.

SATIS diximus de SVPREMA VOLVNTATE, sed magis interest, ut de negotiis INTER VIVOS diligentius dispiciamus. Mortui enim illi facile ignoscent nobis, si quid praeter illorum voluntatem, cuius fructus ad ipsos non pertinet, constituamus, et heredes, qui ex arvis alienis messem capiunt, etiam modico lucro contenti esse possunt, quamvis minus, ac testator voluerit, ex obscuro eius testamento consequantur. Sed INTER VIVOS magis refert, ut negotia subsistant, de quorum prouentu ipsi gaudere possunt et ex quibus ipsi fructum aliquem utilitatis capiunt. Igitur haec quoque, quae INTER VIVOS gesta sunt, interpretatione, si fieri hoc possit, sustinemus atque confirmamus, ne prorsus irrita et caduca uideantur. Et primo quidem DECIVS ex PAPINIANI *Responsis* observauit, possessionem rerum donatarum efficaciter infantibus tradi posse. Quamvis enim possessio, non solum corpore, sed etiam ANIMO acquiri debeat, infans autem non habeat plenum ANIMI AFFECTVM; l. 3. C. de *acquir. uel retin. poss.* uisum tamen est sufficere, quod infantes plerumque malint rem, quam non intelligunt, habere quam amittere, qua uoluntate, quamvis imperfecta, uidentur acquirere possessionem.

D

SED

SED maxime in CONTRAHENDIS NEGOTIIS iuris interpretes aliquid fragilitati dandum esse censuerunt, ut etiam imperfecta negotia, quae tota et integrà non subsistunt, ex parte illa, quae PERFECTAM SVBSTANTIAM accepit, ita subleuentur, ne NIHIL ACTVM esse videatur. Res erit luculentior in exemplis. Igitur pauca attingemus. Et primo quidem, licet expeditum sit, quod nihil magis consensum perturbet, quam VIS ET ERROR; tamen ne ERROREM quidem prorsus infirmare negotia placuit. Valet enim emptio, si de CORPORE. uendito et de GENERE MATERIAE consentiamus, licet in QUALITATE SPECIALI materiae fuerit erratum. Ita PAVLLVS rem definit *l. 21. §. 2. D. de Act. empt. et uendit.* sed subtili quidem iure, quoties ERROR in quacunque parte interuenerit, negotium deberet infirmari, quod VLPPIANVS ex MARCELLO monuit *l. 9. D. de Contrahend. empt.* Enim uero, si in praecipuis partibus uere consensimus, obtinuit, contractum sustineri, et errorem actione empti atque praestatione eius, quod interest, corrigi, nisi ipse emptor, ob insignem errorem, malit discedere ab emptione *l. 11. §. 5. D. de Act. empti, et uendit.*

IMO uero longius processit benignitas interpretationis, ut sustineamus negotium, quamuis in IPSA SPECIE CONTRACTVS dissentiant illi, qui negotium susceperunt, modo in idem GENVS CONTRACTVS consensisse uideantur. Eleganter IULIANVS hoc tractauit in illa specie, si quis nummos Titio dederit ANIMO DONANDI, sed TITIVS mox illos redditurus QUASI MUTVOS acceperit, adeoque non conuenerit inter partes, ex qua caussa nummi, ex mutuo an ex donatione, ad Titium translati sint. Sed IULIANVS ait, dominium nummorum ad Titium transiisse, cum partes consenserint in GENERE contractus. *l. 36. D. de Acquir. rer. dom.* Vterque enim in eo conueniunt, quod nummi liberaliter ex CONTRACTV BENEFICO ad Titium peruenire debeant, ex mutuo uel ex donato; quapropter non infirmum est negotium, quamuis illud subtili iure impugnari posse arbitretur VLPPIANVS. *l. 18. D. de Reb. cred.*

*credit.* Sed de hoc argumento alio loco copiosius exposui. <sup>a</sup>

EODEM pertinet, quod NOVATIO debiti, quamvis inutiliter facta et vitiosa sit, LIBERATIONEM prioris debitoris continere videatur, quod supra observatum est ex §. 3. *Instit. quibus mod. tollit. oblig.* Nimirum possumus etiam inuitum et ignorantem NUDA VOLUNTATE liberare. l. 53. D. de solut. Sed qui NOVARE vult, id agit, ut priorem obligationem dimittat, novam constituat. Igitur, quamquam nova obligatio sit irrita, tamen valebit ut remissio debiti prioris, quae perfecta est, et nuda voluntate fieri potest, atque ipsa novatione continetur. Debitor ergo prior liberatur, nisi Praetor interueniat ex singulari causa aequitatis.

DE CESSIONE VVSFRVCTVS antea diximus, quod NULLA sit, si extraneo cedatur; sed, quia tamen cessio illa RENVMCIATIONEM ususfructus continet, quae semper permessa est fructuario, cessio ususfructus VT RENVMCIATIO valebit, quare ususfructus redibit ad dominum proprietatis. l. 15. D. Fam. ercisc. Sed de CESSIONE ACTIONIS ET HYPOTHECAE iudicialis interdum acrius disputatum est. Haec enim cessio nominis proprie est VENDITIO, continet autem etiam MANDATVM, quandoquidem cessionarius, VT PROCURATOR IN REM SVAM, non proprio, sed CEDENTIS, NOMINE agit, adeoque easdem exceptiones timere debet, quae cedenti efficaciter opponi possent. l. 66. §. 2. D. de Euid. Imo uero iure Saxonico Electorali sapientissime constitutum est, ut, si cessionarius ex iure cesso agat, non solum ipsi, sed etiam cedenti, in eadem lite iuramentum deferri possit, quasi ipse cedens litem instituerit per procuratorem suum. Ord. Proc. Sax. Recogn. Tit. 18 §. 6. At uero, ut diximus, res illa aliquando in controuersiam adducta est, an cessione hypothecae iudicialis inutili mandatum etiam contineatur

D 2

tur

<sup>a</sup> uid. Praesidis dissertatio: de proprietate rei donatae ad eum, qui quasi mutuum accepit, transiente.

tur. Extraneus quidam creditor, iurisperitissimus, sed Iuris Saxonici immemor, fratri suo hypothecam iudicalem priuatum cesserat, hoc consilio, ut frater per Aduocatatum suum debitum pereret et exigeret a debitore, utque ambages mandati specialis euitaret. Vere suberat mandatum, quod ex uerbis ut frater debitum NOMINE CEDENTIS exigeret, et solle die Schuld an seine Statt eintreiben, luculenter apparebat. Sed cessio hypothecae NULLA ERAT, cum haec quidem absque iudicis confirmatione non subsistat: quod in Saxonia Electoralilege speciali cautum est. *Ord. Proc. Sax. Rec. Tit. 46. § 2.* Interim debitor facultatibus lapsus conturbauerat. Orto CONCURSV CREDITORVM, cessionarius petebat debitum in termino liquidationis, quem dicunt. Curator litis excipiebat, CESSIONEM PRIVATIM FACTAM OMNINO NULLAM ESSE, hinc nec cessionario hypothecam competere, neque cedenti, qui iuri suo renunciauerit per inutilem cessionem hypothecae, et qui ipse certe debitum per mandatarium perere debuisset in termino liquidationis, in quo omnes creditores sub POENA PRAECLUSI adesse iussi erant. Cessionarius replicabat, HAC CESSIONE MANDATVM CONTINERI, et, quamuis cessio nulla sit propter defectum confirmationis, tamen hanc cessionem valeat MANDATVM, quod nullam confirmationem iudicis requirat. Res in ambiguum adducebatur. Enim uero, si EX IVRE COMMVNI respondeamus, nisi aliud LEGE PROVINCIALI cautum sit, certius est, hanc CESSIONEM VALERE VT MANDATVM. et rem ita accipiendam esse, ac si creditor cedens ipse per mandatarium hypothecam suam allegauerit in termino liquidationis, ne iure sub excludatur. Est enim poena priuationis odiosa, neque, nisi speciatim ipsi legi adiecta sit, locum inuenire solet. Non obstat, quod FRUCTVARIVS ius suum AMITTAT, si extraneo cedat usumfructum. Nimirum fructuarius, dum usumfructum extraneo cedit, ALIAM PERSONAM in locum suum SUBSTITVIT CVM INCOMMODO domini proprietatis; cum substitutus, integer forte et adolescens, diutius

rius usumfructum usque ad mortem suam retinere possit, quam primus fructuarius senex et infirmus. Igitur amittitur ususfructus per cessionem inutilem, ne dominus incommodo afficiatur. At uero, per cessionem hypothecae priuatam, conditio debitoris NON FIT DETERIOR, cum eadem cessionario exceptiones opponi possint, quae cedenti obstant. Quare, si nihil in fraudem legis gestum sit, facilius toleramus cessionem hypothecae quam ususfructus, et poenam priuationis certe remittimus in negotio, quod fauorem aliquem meretur. In hac specie igitur CESSIO hypothecae. INVTILIS VALEBIT VT MANDATVM.

EODEM iure utimur IN TRANSACTIONIBVS, quae iure subtili tunc demum uim suam habent, si DE RE DVBIA fuerit transactum. *l. i. D. de Transact.* Qua re efficitur, ut de RE IUDICATA proprie transigere nequeamus; quandoquidem res iudicata tollit DVBITATIONEM ET CERTVM ALIQVID definit. *l. 32. C. de Transact.* Sed licet tamen uictori MINVS ACCIPERE, quam ipsi adiudicatum erat. Igitur, si uictor transegerit cum uicto, ut MINVS SOLVATUR, PARTEM debiti REMISSISS CENSEBITUR, et transactio inutilis ualebit ut PACTVM REMISSORIVM, quod TRANSACTIONE illa CONTINETVR et semper permisum est modesto creditori.

RespluS difficultatis habet IN NVDIS ET IMAGINARIIS CONTRACTIBVS, ueluti, cum quis rem VENDIT pretio constituto, sed illud pretium se non exacturum esse promittit ANIMO DONANDI. Constat, VENDITIONEM NVLLAM esse, cum SUBSTANTIA huius contractus requirat, ut res PRO PRETIO uendatur, et PAVLVVS doceat, rem nequidem ALIENARI PER IMAGINARIAM VENDITIONEM *l. sc. D. de Contrah. emt.* Possit igitur dubitari, an non hac uenditione, quamuis INVTILI, DONATIO contineatur quae sine pretio constituto perfecta est. Certius uiderur, si nihil in fraudem legis gestum sit, uenditorem premium

tium exigere non posse, cum exceptione REMISSIONIS submoueri queat. Apposite enim HERMOGENIANVS monet: *l. 6. D. pro donato*, DONATIONIS CAVSSA facta uenditione, non pro emto, sed pro DONATO rem traditam VSVCAPI. Quae cum ita sint, donatio continebitur imaginaria uenditione. Tolerabantur hi contractus iure ueteri in emancipatione liberorum, in testamentis per aes et libram, in dotis constitutione *l. 66. D. de iure dot.* et quoties aequitas illud suggerebat. Nos quoque in Geradae et Heergeuuettae uenditione, propter summum huius negotii fauorem, non adeo scrupulosi sumus, quamuis uenditio illa imaginaria esse uideatur. Ausim igitur affirmare, PAVLLVM in *l. 55. D. de Contrah. emt.* in qua prorsus damnat nudam et imaginariam uenditionem, de illa specie intelligendum esse, si negotium in fraudem legis susceptum fuerit, aut si partes non VERE CONSENSERINT in donationem, sed NIHIL AGERE et nugari uoluerint imaginaria uenditione. Secus igitur iudicandum est, si CONVENERIT inter partes, ut sit donatio, et donator solo pallio atque inani titulo imaginariae uenditionis rem texerit, forte ne heredes eius indignantur, si uideant sibi aliquid eripi aperta et explicita donatione.

NON absimile est illud, quod PROMISSIO FACTI ALIENI REM IMPOSSIBILEM contineat, adeoque INVUTILIS esse uideatur, sed, si tamen POENA CONVENTIONALIS, cuius promissio PER SE PERFECTA est, huic stipulationi adiecta sit, poena peti possit ex INVUTILI CONTRACTV, qui duas promissiones, alteram facti alieni inutilem, alteram efficacem poenae stipulationem continet, § 20. *Instit. de inutil. stipulat.*

Hoc igitur iure in contractibus utimur, ut etiam inutile negotium ualeat, quod duplicem actum, alterum imperfectum, alterum perfectum, continet, ut ex parte perfecta fructus aliquis sperari possit. De IVRE REFORMVLARIO, quod alias subtile et scrupulosum est, tribus uerbis aliquid monebo. Constat, in CRIMINALI iudicio, et quoties de poena delicti quaeritur,

LEVTERATIONEM non admitti. Sed Leuteratio tamen contrinet speciem DEFENSIONIS, quae permixta est in quaestione delictorum. Saepe reorum Aduocati contra sententias, in quibus non solum caussa civilis decisa est, sed etiam POENA delicti reis irrogata, LEVTERATIONIS REMEDIO utuntur, etiam ut poena MITIGETVR. Et obtinent mitigationem poenae, si argumenta graui adducant; cum Leuteratio, quantum ad delicti poenam attinet, pro defensione accipienda sit, quae nunquam fere reis denegatur.

EXTREME de LIBELLO INEPTO constar, illum, quasi nunquam prolatus fuerit, pro Nullo et INVILI haberi, neque efficere, ut IUS PRAEVENTIONIS aut LITIS PENDENTIS allegari possit, quamuis iudex reum citauerit, ut respondeat ad ineptum et inutilem libellum. Sed INEPTO etiam libello actor declarat ANIMVM PERSEQUENDI IUS SVVM IN IUDICIO, et sufficit ad PRAESCRIPTIONIS INTERRUPTIONEM INTERPELLATIO IUDICIALIS, qua serio testamur, nos ius nostrum dimittere omnino noluisse, quamuis igitur libellus ineptus vim libelli plenam non habeat, tamen PRAESCRIPTIO per illum INTERRUPTETVR, si aduersarius citatus fuerit a Magistratu. Sapientissime enim in Saxoniae Elektoratu constitutum: Wann auch schon die Klage angebracht massen verworffen worden, soll dennoch die vorher ergangene Citation EFFECTVM INTERRUPTENDAE PRAESCRIPTIONIS, keines weges aber praeventio- nis et litis pendenciae, haben, *Ord. Proc. Saxon. Rec. Tit. 5. §. 4.*

HAEC igitur, de quibus adhuc disputauimus, vim quidem aliquam exerunt et fructum pariunt. sed tamen, ut antea monui, imperfecta atque etiam NULLA appellantur, quia non EXPLENT consilium illius, qui negotium suscepit. Elegantissime VELLEIVS PATERCVLVVS\* M. Antonium de caede Ciceronis frustra sibi plaudentem hac formula derider: „NIHIL EGISTI, M. Anto-

\* Velleius Paterculus Historiar. Rom. Lib. 11. cap. 66.

„Antoni, NIHIL, inquam, EGISTI, mercedem coelestissimi  
 „oris et clarissimi capitis abscissi numerando. RAPVISTI tu  
 „M. Ciceroni lucem sollicitam et aetatem senilem et uitam  
 „miseriorem te principe, quam sub te triumuiro mortem:  
 „famam uero gloriamque factorum atque dictorum adeo NON  
 „ABSTVLISTI, VT AVXERIS. Viuit, uiuetque per omnem se-  
 „culorum memoriam, omnisque posteritas illius in te scripta  
 „mirabitur, tuum in eum factum execrabitur, citiusque mundo  
 „genus hominum, quam laus eius, cadet.”

SED haec quidem de fructu et effectu negotii inutilis et  
 imperfecti in mentem uenerunt. Plura  
 addere non uacat.





